


# mainatges d'òc **PLUMALHON**

(5,70€)

ISSN 1264-6733



Legionaris romans e vilatge gallés



**Pòl Emili**



**Gorrin e Pipaut**



# Mots mesclats

R D C Z S E B F A P B N B F E  
 E A E Y Q I R I K J Q R K C S  
 I R T S Q A A V D S O J A B C  
 T P O S P C I P I N E V N A R  
 S A O M I L M R Z R A I F T I  
 E T B A A U A E E M V L T E T  
 M B S M D N Q C E L W A N U U  
 Q O Z A O R S N A W A T E F R  
 M P R I T C T F O R W G M Y A  
 A I G E V R O N E C S E A A M  
 E E L O C O M O T I V A P D K  
 L T E C N I C A O S O J I E K  
 P O B L E S E L G E S W U N C  
 X O S E T L E C L K A J Q O T  
 R Y X T C U B E K H P A E M T  
 U Q D R M N C N C L I A H Z O

- BATÈU • BRONZE • CAVAMENT •
- CÈLTES • COMBAT • CONQUISTAR •
- DESPLACAR • EQUIPAMENT •
- ESCRITURA • GALERIA •
- LEGIONARIS • LOCOMOTIVA •
- MESTIÈR • MONEDA • MOSAÏCA •
- MUDAR • NORVÈGIA • PÒBLES •
- ROMANS • SÈGLE • TECNICA •
- VILATGE •

9	5	3	3	4	1	7	2	6	8
7	4	1	8	2	7	6	8	7	7
6	8	4	7	6	5	2	9	1	3
1	8	4	5	3	3	7	7	6	9
4	2	5	6	9	8	7	1	5	1
9	7	3	3	1	6	4	8	2	5
3	6	9	7	1	5	4	2	8	8
8	7	1	3	5	4	2	6	9	1
4	6	8	2	7	3	5	9	1	4
2	3	1	8	9	5	6	7	4	7
7	5	9	4	1	6	2	3	8	8

• Aisit

7	4	1	2	3	6	9	5	8
5	9	6	8	1	4	2	7	3
3	8	2	5	9	7	1	6	4
2	7	4	1	6	8	5	3	9
9	1	3	7	2	5	4	8	6
8	6	5	3	4	9	7	1	2
1	2	7	9	8	3	4	6	4
4	5	8	6	7	2	3	9	1
6	3	9	4	5	1	8	2	7

• Aisit

Sudoku :

Responses as jòcs :

p. 10  
 Mot mistèri : legionari, decoratiu, territòri, descobrìr,  
 escultura, emperaire, desplaçar, pregondor.  
 Eth mot de sobres : volamarìa.  
 7 diferéncias : La mèrca sus era ala ena dreta, mèrca sus era  
 ala ena quèrra, na antena, ena part dreta dera ala, na flor  
 naut ena dreta, na auta flor ena dreta e un paut a ena  
 quèrra.  
 p. 11  
 Eth bon orde :  
 galles, argent, cereala, alfabet, contrada, paisatge.





maistras d'òc  
**PLUMALHON** — B. p. 50486 — F-64238 LESCAR INDUSPAL CEDEX  
 Tel. : 05 59 81 02 59 — Fax : 05 59 77 97 43

Director dera publicacion : David Grosclaude  
 Cap redactor : David Grosclaude  
 Conselhèrs lingüistics : Sèrgi Carles  
 Compaginacion : Vistedit (64230), Brigitte Bouncer  
 Belem 70 — 64160 St Jammes — RCS 491986659  
 SARL SCOP deu capitau de 17 076 € — Sièti social a Lescar (64230)

Plumalhon ei  
 publicat damb  
 era ajuda de :





Pòc temps dempús...



# Un vilatge gallès

Tèxte David Grosclaude


**N**on ei pas eth d'Asterix e d'Obelix e de tota manèra non se tròbe pas bric ena madeisha region. Non ei cap en Armorica mès en país occitan.

**E**th vilatge gallès qu'auem visitat se tròbe sus era arribèra dera Garona, a on demorave un còp ère, eth pòble dit vòlcas-tetosags. Com toti es pòbles qu'es romans nomentèren « gallesi » non èren pas barbars deth peu de carròta e long, damb mostaches, e que sonque sabien passar eth dia corrent ath darrèr des sanglièrs ! Es cèltes sabien benben causes. Que mestrejaven plan er art deth hèr, deth bronze, neuriven bestiar e qu'èren boni agricultors. Bastiven vilatges embarrats per palissats, auien es sues credences pròpies e batien moneda de coeire, d'argent o d'òr.



**A** queri qu'an imaginat aqueth vilatge an volut concentrar eth saber des pòbles dits « gallesi ». An sajat de bastir un vilatge ath bòrd dera Garona damb es tecnicas que mestrejaven es vòlcas-tectosags.

Ei un vilatge cinturat damb un palissat. Es tets son de palha, o de talabena com diden tanben. Es parets son de tèrra, de tàpia. Que i a laguens deth vilatge desparièrs mestieraus com sabem que i auie enes vilatges d'aquera epòca.



## Qui son es gallesi ?

**H**è atencion pr'amor qu'entà parlar des gallesi cau prumèr desbrembar-se causes fausses que son encara en quauqui libres d'istòria tara escòla. A truca de voler simplificar es causes qu'an tendéncia a hèr a creir que çò qu'ei era França d'aué qu'ère eth territòri dera Gàllia d'un còp ère.



Qu'ei er especialista deth bronze. A installat eth sòn talhèr com deuie èster installat dus mil ans a. En çò d'aqueri pòbles que coneisheven er art deth bronze des de hège fòrça temps. Eth bronze ei ua mescla de coeire e d'estanh. Eth bronze servive tà hèr objectes decoratius o jòies. Es armes non èren pas de bronze mès de hèr, un metau fòrça mès resistant.



**E**s gallesi qu'ei eth nòm balhat pes romans a pòbles que viuien en nòrd d'Itàlia, en territòri de Belgica, de Soïssa e d'Alemanha d'aué. Aqueri pòbles viuien tanben en ua part de çò qu'ei era França d'aué en dia. Entara region que se tròbe ar oèst dera Garona se parle meslèu d'aquitans que de gallesi. Es cèltes demorèren meslèu ar èst der arriu.

Mes non ei pas just de díder com se podec liéger molt de temps enes manuaus d'istòria : « Abans, eth país de França se didie era Gàllia ». Per çò qu'ei des gallesi eri non se didien pas atau. Es gallesi son pòbles diversis damb cultures e lengües i a còps diferents.

**E**s gallesi son cèltes arribadi lentament d'Euròpa centrau hè 26 sègles apuprèt. S'installèren en Euròpa occidentau e tanben en Gran-Bretanha (dita Bretanha ena epòca pes romans) e en Irlanda. Que i heren comèrci e portèren tanben era sua cultura. I heren era guèrra e trobèren abitants installadi abans o dempús d'eri com per exemple es grècs sus es ribes dera Mediterranèa. Aguesti creèren viles com Marselha, Niça, Agde. Mès tot aquerò se hec en diuèrsi sègles.



## Es romans conquistèren era Gàllia en 52 abans JC !

Aquerò tanben qu'ei ua vision romana des causes. Qu'ei Juli Cesar qui ac ditz e qui ac escriu en « Era guèrra des Gàllies ». Non demorèren pas a Juli Cesar es romans entà installar-se en oèst de Roma. Prumèr s'imposèren as cèltes deth nòrd d'Itàlia e dempús en dusau sègle abans dera nosta èra, que creèren era « Província Romana » que va dera Garona enquia Niça en tot remontar enquiath lac Leman.

Que calec donc mès d'un sègle tà que Roma arribèsse a imposar era sua lei a toti es pòbles gallesi. Aquerò ditz Cesar, que combatec fòrça contra es darrèri pòbles qu'arrefusaven era autoritat de Roma.

Mès en aquera conquista toti portèren quauquarren ar aute. Es pòbles cèltes ensenhèren causes as romans e aguesti influencièren fòrça



Eth materiau entà pesar e bàter era moneda.

segurament as pòbles des territòris cambiats en províncies romanes. Er occitan, eth catalan, eth castelhan, er italian, eth francés son lengües gessudes deth latin. Eth breton qu'ei ua lengua celtica. Se pòt díder qu'ei segurament pròp d'ua lengua parlada pes diti gallesi.

Per çò qu'ei dera part oèst deth territòri conquistat per Cesar, era Aquitània, ère com ac auem dit, aucupada per poblants que non èren pas cèltes e era sua lengua deuie semblar era lengua basca d'aué.

## Era construccion deth vilatge

Que comencèren de bastir-lo en 1996 e que se dauric ath public en 2003. Jen Luc Blanchard, eth director explica que pensave qu'auien parlat massa mau des gallesi e que calie restablir cèrtes vertats. Bastir un tau vilatge qu'ei hèr arqueologia experimentau : « Tostemp que discutim damb es arqueològs », precise.

Tot a estat hèt pera associacion qu'assegure era gestion deth vilatge. « Auem segat eth gran entà auer era palha tàs tets. Auem semiat gran en quate ectares. Non auem pas hèt a vier especialistes. Ac volièm descobrir e hèr tot nosati ».

Sense dobte entà bastir tot aquerò calie paciència e èster capable d'assimilar diferents techniques.





**E**ra mira d'aguest vilatge ei de hèr a saber e de hèr a comprèner ath mès gran nombre de persones : « Sense nosati es scientifics non servissen pas tad arren se non i a pas arrés entà explicar ath gran public » ce ditz eth director. Qu'ei pr'amor d'aquerò qu'an installat laguens deth vilatge diferents mestieraus damb es apèrs e es tecnicas d'aqueth temps (prumèr sègle abans JC).

Que i a un haure, un especialista deth bronze, un aute que hè tistalhes ; e que hèn a veir tanben com batien era moneda es vòlcas-tectosags.



**E**s gallesi non utilizaven pas era escritura. Ère un shinhau contrari as sues credences. Tad eri eth saber se transmeteve oraument. Totun que les arribave de servir-se der alfabet grèc o roman tà escrìver era sua lengua. Mès es escrits en ua lengua gallesa son ben escassi. Qu'ei pr' amor d'aquerò que sabem pòga causa des lengües d'aqueri pòbles. Totun, sabem qu'enes nòstes lengües, i a mots des pòbles gallesi que mos an passat.

**E**th hèr ère eth trebalh deth haure. Que hège apèrs de trebalh e armes. **E**s haures cèltes qu'èren renomadi. **E**s mestieraus deth vilatge expliquen as visitaires com trebalhen damb es tecnicas dera epòca.



Fòtos Patrick Cabrol e David Grosclaude

L'agaçon qu'ei un minjaire de coscolhas.



Tèxte e fòtos de Fred Lavail

# Er agaçon


**Qu'ei un audèth que poderàs veir posat dessus d'ua arròca en bòrd de mar. Lo coneisheràs lèu pr'amor deth bèc ròi. Ac garde tot en sòn entorn. Qu'ei un agaçon.**

**A** era pluma un shinhau com es pigues, coneishudes tanben com agaces. A era pluma blanca e nera. Eth bèc l'a long e ròi com es pautes. Eth bèc qu'ei un apèr des boni entà hurgar ena basa e cercar vèrmes. I a còps, com ena fòto, que son dus a auer

gahat eth madeish vèrme, alavetz que i a peleja. Mès aqueth bèc qu'ei tanben fòrt pr'amor que pòt trincar era clòsca d'ua coscolha. Li agrade de quan en quan de minjar muscles o d'autres coscolhes.








**E**r agaçon que hè de 40 a 45 cm de longor e sonque es bèsos son de 8 o 9 cm. Es adults an eth uelh ròi.

Eth nin der agaçon non ei pas guaire elaborat.





**U**n còp per an era femelha que hè dus o tres ueus en un petit clòt per tèrra. Que còve tres setmanes de temps. En nèisher es petits qu'an plumion, deth gris e nere dessús e deth blanc per baish.



**E**s agaçons viuen un arramat d'ans. Diden que pòt anar enquia 35 ans. Es joeni non an pas encara ben ròi eth bèc. Era punta qu'ei mès escura e es uelhs que son marrons.


Com d'auti audèths les agrade de hicar-se laguens dera aigua a on non ei pas massa pregonda e de heregar-se. Quan n'an pro de cercar-se eth minjar que se van a aporalhar en ua arròca e que s'amaguen eth bèc dejós dera ala mès totun eth uelh que demore dubèrt e que s'encuenden de tot ço que passe ena riba.






## Mot misteri


En cada gresilha que i a letres que hèn un mot. Totes qu'an de servir. Que cau començar pera letra en gròs. Es letres que se seguissen enes mots que son tocatocantes enes gresilhas. Qu'as indicis tà trobar.




Soldat




Tà ornar



Pais, tèrra



Trobar



Òbra d'art



Cap d'empèri



Cambiar



Ath hons

## Eth mot de sobres

### Es animals

Toti es mots qu'as aciú que son ena gresilha mès que i son retalhadi e mesclats. A tu que te tòque de tornar a hèr aguesti mots e despús escriu eth mot en miei en amassar es tròci que sobren.


LHON	RIA	PA	CÈR	GLIÈR	VA	A	PA
GRAU	MOS	CA	GRI	MOS	RÒ	SHON	NHA
LHA	QUE					VÒLA	VE
ES	SSA					LÈ	BA
AU	TAI					SA	MA
LO	PAR					BE	NA
RA	MA	CA	RÒU	VES	LHA	MIT	CA
CRA	A	BE	RIAN	PAUD	BRO	AR	RI
SAN	GI	CA	VI	QUIT	HA	CA	PA
A	CA	ÇON	PAN	TER	BI	QUI	LON

- ABELHA •
- ARIÇON •
- ARRIAN •
- AUCA •
- ARANHA •
- BROSSALON •
- CABIRÒU •
- CAVECA •
- CÈRVI •
- CRABA •
- ESQUIRÒ •
- GRAULHA •
- GRIPAUD •
- HAGINA •
- LÈBE •
- MOSCA •
- MOSQUIT •
- PALOMA •
- PANQUESA •
- PARPALHON •
- SANGLIÈR •
- TAISHON •
- TERMIT •
- VACA •
- VESPA •

--	--	--

## 7 diferències

Troba es 7 diferències entre es dues fòtos.




# Eth bon orde

Amassa 2 mots de 6 casas, 2 mots de 7 casas,  
2 mots de 8 casas de medisha color. Tots los  
mots son en aqueste *Plumalhon*.



N	E	B	G	T	C	E
A	P	R	E	L	R	N
T	A	S	F	A	G	L
A	E	A	R	D	A	A
S	E	L	E	A	O	A
G	A	C	T	I	T	L



# Sudoku

• Aisit

6	9			8		
4	5	8		7	2	
				3	6	5
			4	9	7	1
9		7	5			6
	7	4	1	6		
3	2	5				
5		8	1		2	7
	1				9	8

• Mejan

		6		1		4
2	4			7		
8				5	4	
3	6	9	7			
						8
4				8	3	7
	8		5	3		
5			6			
9		1			5	

• Aisit

		6	3	8	2		9
		8				6	2
3			9			7	5
2				4		9	
6	3						4
		5		3			2
8	2				3		7
	4	1				3	
5		4	1	7	2		

• Mejan

7				1	6			8
2				9		6		
	6		2				9	
	8	2			7			9
		3	1		4	8		
5			9			3	6	
	9				1		5	
		7		5				3
1			3	4				6





**Q**uauqui passonats hèn a tornar a víuer era VIII Legion Augusta, ua legion creada per Juli Cesar e que participèc ena guèrra des Gàllies. Segur que se divertissen, qu'ac hèn peth plaser, mès que son tanben istorians e cercaires.

Texte David Grosclaude

# Legionaris !

**V**estir-se de legionari roman pendent quauques ores, víuer ara mòda des soldats dera VIII legion de Cesar : d'aquerò ne diden arqueologia experimentau. Ath miei d'aqueri passonats dera epòca romana e des sues legions i a gent venguda d'un shinhau pertot. Pòrten era sua contribucion ara coneishença dera istòria. Les interèsse era vida des militars de Roma mès tanben era vida-vidanta que se desvolopave ar entorn des legions.




## Armes e apèrs identics

**F**in finau qu'ei pro logic de díder que, en sajar de tornar a hèr de manèra identica, es objèctes trobats enes cataments poderàn verificar es ipotèsis hètes pes istorians o arqueològs. Ací donc toti se hèn eth sòn materiau, es vestits e es armes damb es techniques qu'èren coneishudes ena epòca. Es gladis (es espades), eth boclèr, es espartenhes de cuer, era còta d'armes (o berguentina)... E de segur qu'ei en tot hèr aqueth materiau que se pòt comprèner era tecnica des mestieraus dera epòca e era qualitat deth sòn trabalh. Que cau tornar a descobrir techniques desbrenbades.



**T**à comprèner se com trebalhavan ena epòca des romans cau tanben estudiar es documents com es mosaïcs o es escultures e a còps que i a quauques pintures. E sensen dobeste tot aquerò trobat enes cataments qu'ei fòrça util. Un còp qu'an eth materiau ei possible de hèr ua representacion cap a un public de çò qu'ère ua legion romana. Atau es nòsti passionats que hèn a conèisher com ère era vida deth legionari e des sòns, com ère eth combat e er entrenament.





Sonque era còta d'armes que podie pesar de 12 a 22 kg.



## Ua vida de legionari

Eth legionari auie ua vida ben dura. Prumèr demorave legionari pendent vint-e-cinc ans. Ei segur qu'ère prestigiós de hèr part dera gloriosa VIII Legion Augusta. Er equipament deth legionari ère pesant. Sonque es armes pesaven soent entre 20 e 25 quilòs. Que i calie ajustar çò d'aute. En tot, eth legionari que podie carregar entre 40 e 50 quilòs ena esquia. E carregar tot aquerò sus diuèrsi detzeats de quilomètres non ère pas de bon portar.



Crear eth sòn equipament demane saber, temps e paciència. Tanben er equipament de basa deth legionari que còste de 4 000 a 5 000 euros. Entà un centurion qu'ei un shinhau mès car ; que pòt arribar a 15 000 euros.

Aqeri passionats deth mon roman trebalhen en relacion damb es istorians. Utilizar sonque es apèrs e es airines dera epòca hè a progressar era coneishença.



**E**r empèri roman durèc diuèrsi sègles e es progrèssi sigueren permanents. Es passionats dera VIII Legion Augusta escuelheren eth periòde deth primèr sègle dera nòsta èra. Aquera legion existic dus sègles de temps.




## Qui èren es legionaris ?

**N**on cau pas creir qu'es legionaris arribaven toti dera vila de Roma. Es legions èren hètes d'òmes recrutats per totes es contrades der empèri. Era armada romana qu'ère donc ua gran mesclanha de pòbles, de cultures e de lengües. I auie benben legionaris qu'èren germans, o cèltes gessuts des pòbles diti gallesi. I auie ibèrs tanben o òmes venguts deth nòrd deth continent african.

Qu'ei un shinhau atau que neisheren es lengües latines que coneishem aué. Cada un que se metec a parlar eth latin damb eth sòn accent, era sua manèra de prononciar e portant mots dera sua lengua mès d'un còp.

Mès era fòrça de Roma que siguec era sua tecnica militara. Es legions sigueren temudes fòrça temps e heren de Roma ua poténcia extraordinària.





En Kiruna an hèt monuments ara glòria des minèrs.

Tèxte e fòtos David Grosclaude

# Eth camin deth hèr

**K**iruna, ath nòrd de Suècia qu'ei era vila deth hèr. E que va auer de cambiar de lòc. Qu'ei eth començament deth camin deth hèr e ar aute cap i a eth pòrt de Narvik en Norvègia.

Kiruna non ei pas ua vila grana. I viuen apuprètz vint mil estatjants. Entàs ans que vien van a conéisher un cambiament des grani. Que van a desplaçar era vila, tota era vila. Aquera vilòta de Lapònia se desvolopèc ar entorn dera sua mina de hèr, ua des mès importantes deth mon.








Eth tren circule facilament en estiu mès quan arriba

er ivèrn cau soent trèir era nhèu. An bastit tanben

tunèls e paranhèus entà protegir era linha.

**A**th començament dera espleitacion deth hèr — que hè dus sègles— en trègen eth metau en catar era tèrra simplament. Mès des de hè quauqui decennis que cau catar en pregondor e hèr galeries dejós dera montanha. D'aqueri tunèls, correders e galeries que n'i a 400 km. Mès de catar atau que met era vila en perilh. Era tèrra que s'estartalhe e era vila risque d'enfonçar-se. Alavetz enguan era municipalitat a decidit desplaçar tota era vila. Mès que cau temps tà hèr aquerò. Ua part dera vila s'aurà desplaçat en 2030 mès tot serà acabat sonque en 2099. Segur qu'auessen podut decidir de deishar de catar era tèrra mès Kiruna non aurie pas agut cap mès rason d'existir. Era vila de Kiruna ei ua grana herrèra e sonque ; e ath delà rapòrte fòrça sòs ath país.



Era glèisa grana de Kiruna, hèta tota de husta, se tròbe en un

andret que risque d'esbauçar-se, com era casèrna des

pompièrs o d'alti bastiments com era Casa dera Vila.



**E**th minerau de hèr de Kiruna ei portat damb eth tren enquiath pòrt dera petita vila de Narvik, mès ath nòrd en Norvègia. Tà anar-i eth tren travèsse pendent tres ores un paisatge extraordinari. Es darrèrs quilomètres son espectaculars pr'amor que cau baishar cap ath fjòrd a on ei eth pòrt. Calej bastir ua linha de camin de hèr fòrça especiau. Se i passegen es locomotives mès potentes d'Euròpa sus penents importants. Es trens pesen enquia 8 000 tones.



Eth camin de hèr qu'ei tanben dubèrt tàs viatgèrs. Mes qu'ei ua via unica, alavetz es trens se crotzen enes estacions petites a on era via ei doblada.



**P**endent era bèra sason (que dure sonque quate mesi) ei mès facil, mès quan arribe er ivèrn (d'octobre ara fin d'abriu) era temperatura baishe enquia - 30° o - 40° sus era màger part dera linha. Qu'èm ath dessús deth cercle polar arctic. Pendent er ivèrn es nets que son ben longues mentre qu'en estiu es dies son longui e pendent un mes eth solei non se vò cogar.



En pòrt de Narvik bèri batèus que se carguen eth minerau de hèr. Que serà honut e trebalhat en dièrsi païsi deth mon. Era demanda d'acèr a estat fòrta aguesti darrèri ans. Narvik vedec a passar 32 milions de tones de minerau er an passat. Que cau un arramat de trens.



**E**th pòrt de Narvik qu'a tostemps agut un important ròtle ena exportacion deth hèr. Des de detzeats d'annades qu'alimente en minerau de hèr fabriques de pertot en mon. Aqueth pòrt, per estar ben ath nòrd, non ei jamès blocat peth glaç pr'amor qu'ath costat i passe eth corrent caud der Atlantic que se ditz eth Gulf Stream.

Atau cada dia arriben en Narvik trens de minerau de hèr qu'ei cargat en batèus.



Era arribada en fjòrd de Narvik. Un fjòrd ei ua longa val de montanha a

on i a entrat era mar. I a fjòrds que pòden hèr mès de cent

quilòmetres de longor e donc era hauta mar qu'ei luenh.



**E**th hèr de Kiruna se comencèc a trèir per'mor dera batalha que, ath començament dera Segona Guèrra mondial, oposèc es tropes alemandes as tropes aliades. Toti volien èster mèstes deth camin deth hèr. Com poder hèr a marchar es fabriques d'armament sense aqueth metau ? Tanlèu que comencèc era guèrra es alemands envadiren Norvègia. Es Aliats preneren Narvik mès sonque per quauques setmanes.





Que vas a veir ! Qu'ei guai  
coma tot açò d'amiar un  
hòrabòrd !...




Alavetz que i ès ? Vas a creir  
qu'ès com un Moïses des tempsi  
modèrns, e vam a traucar era  
onda blua e a talhar es  
ondadas ? Ten-te que i vam !



3. 2.  
1...

**Partit!**




**HAAAAA !?**

**Chooooonnhh**



De segur, se non auesses pas  
deishat eth batèu ena estaca  
qu'auèsem podut hèr sense  
banhar-mos !



Aquerò  
qu'ei ua  
estaca ?

E ath delà qui ei  
aqueth « Moïses » de  
qui parles ? Qu'ei  
campion de vela ?  
En quina annada ?



E tu qu'as batut eth recòrd  
de popar lèit de sauma ?  
Anem, nada !